

順德圖書館賜存

陳崇敬贈
夏月

於東樓苑

如香樓詩詞

何乃文敬題

序

梁君衍祥比於書刊中輯錄南海潘女士思敏所
為詞百闕詩數篇呈女士加改定已將影印數十冊
贈傳友兼惠後學猥蒙不棄屬為之序使挂名篇
籍與有榮光意殊可感也余惟女士為順德陳荆鴻
先生嘉耦而常學倚聲於中山鄭冰心先生二先生
實壇坫耆宿女士備聞道要宏極出眇文譽遍
海內外余昔承命呈詩所謂師母相稱代姓名酒
家傭保共呼聲非妄語也余未嘗學詞梁君以序
相屬強亦以不妄語具取之邪今讀女士詞有序有物

尤覺有氣勢類丈夫之言但知燦然莫能名狀
有如異國人初嘗粵饌惟知適口饜腹其調味之
方食譜所自茫然不能辨也夫女士詩詞之工詎待
余言為增重而梁君七十篤好文藝為詩日益工又
好揚人之善是不可以無述也爰為斯序歸之
庚辰歲九月十九日順德何乃文書於明雙硯齋



域外干戈際，秋宵客館清。空階餘月影，涼露蘸花明。有客來今夕，悲歌憶舊京。余懷殊渺渺，何日見升平。

聞笛

黃昏疎雨過，秋色滿郊原。側耳聽隣笛，游心到故園。清音入寥廓，餘響落潺湲。不見倚樓客，臨風誰與言。

石排灣太白舫

亭亭江上舫，來去又多時。此日逢良會，稱觴頌介眉。山河猶禹甸，鬢髮漸潘絲。美酒知何價，何辭醉一卮。

和水心師乙巳元旦試筆

流居歲月漸忘機。不意春風緩緩歸。得句爭聆高下論，尋思總覺昨今非。喧街爆竹鋪紅錦，倚壁桃花炫繡衣。好約芳郊同買醉，鰕魚縮項報初肥。

和水心師乙巳生朝

吾力猶能肆汝杯。稼軒此際亦豪哉。願言共祝無疆壽，更約同看早歲梅。接席嘉朋隨類聚，當頭好月撥雲開。餘情一顧伊涼曲。正誤還須大匠材。

潘思敏茹香樓詩

叔惠詞長以花外集見貽率爲長句以謝

唐人以詩鳴，詞亦開其宗。花間尙藻麗，靡靡寢成風。獨有烟與垸，風土紀南中。簾杖挂蘆酒，鬱鬱洞葱籠。避暑信船遊。夾岸荔枝紅。重光稱神秀，操觚豈易工。陽春堂廡廣，膚學貌其容。北宋首晏歐，深致造極峰。神宗熙元間，崛起坡翁。銅琶鐵綽板，高唱大江東。蘇門四學士，畦徑異而同。婉約秦太虛，初日映芙蓉。渾厚周清真，止庵所推崇。磬磬漱玉詞，間氣有獨鍾。風流高格調，清露引新桐。諷柳語塵下，一代嘆希踪。南渡諸君子，拙大復沉雄。稼軒繼豪邁，瓣香蘇長公。才大氣縱橫，經史羅心胸。白石脫胎之，騷雅涵清空。率意自度曲，音律協商宮。玉田故王孫，落拓傷時窮。襟期歸汗漫，長嘯傲疏松。展讀碧山集，清剛鳴笙鐘。綿綿故國思，耿耿孤臣忠。天涯芳草意，摛愁千萬重。問途得所由，鞭影勵吾躬。詞話如牛毛，臧否殊夢夢。派別逞歧見，穿鑿交相攻。吐屬出性情，天衣不假縫。人事有代謝，齊物豈能通。求詞於詞外，積學更爲功。知君豐文采，敢以言其衷。願得尊酒間，時復啓愚蒙。

秋鎧話舊

潘思敏茹香樓詞草

滿庭芳 癸卯七夕泛舟石排灣

雲鎖漁村。燈圍畫舫，石排灣外重遊。遠山飛翠，疏落幾層樓。溪岸平沙似錦，輕帆過、唱起羣鷗。邀盟侶，題襟載酒，風月喜同舟。

清秋。憐此夕，人間巧乞，天上槎浮。且關情海客，寄興仙儔。莫問歸程遠近，只歸夢、夢也無由。憑欄久，煙波萬頃，莽莽古神州。

桂枝香 秋日張丹居士設齋筵清涼法苑

秋郊躑躅。正雨過涼生，萬山如沐。歷歷疎籬短徑，徧栽松竹。山扉晝掩房櫺靜，過微風、遠鐘清肅。鷺峰深處，雞園一角，恍疑天竺。念此地偏宜結屋。但掃葉焚香，自忘榮辱。堪笑勞生草草，世塵千斛。漁洲燈火催殘暮，又輕車、來去匆促。幾番回首，屯門古渡，亂雲遮目。

賀新涼 屯門迎月

短棹浮烟渚。似坡仙，橫江白露，溯流光去。見說屯門風物好，容我停舟小駐。更商畧，魚蝦雞黍。掩映村樓燈綵滿，又中秋，明日逢三五。邀雅客，共題句。疎松古寺傳杯渡。

只年來，登臨意懶，思玄堪賦。物異人非陵谷改，爲問蟾圓幾度。念帝子而今何去。輦路空餘黃葉冷，數興亡，付與漁樵父。山一髮，月無語。

楊州慢 深秋過大埔松園

桂子香殘，蓼花紅褪。古園鶴隱涼柯。嘆重陽去後，更綠意無多。况低壓浮雲蔽日。可堪回首，咫尺關河。縱教成，蕭瑟秋吟。心緒如何。當年謝屐，憶春時，梅嶺烟蘿。對十里寒香，一車行色，青鬢銷磨。此際媚川凝佇，黃昏也，幾權漁歌。問懷珠何處，遙遙秋水微波。

慶春澤 甲辰香江春感

疊嶂凝寒，濕雲約雨，賞春心事遲遲。春豈常留。惜春休負芳菲。東風不怕重關阻，徧天涯，喚起生機。愛年時，峽寺維舟，庾嶺尋詩。而今落寞山城外，向青帘貰酒，白社攜詞。暝色浮空，涵江燈照漣漪。何當便任流光轉。也應知，料理歸期。嘆蹉跎，三徑荒蕪，十載居夷。

踏莎行 國風藝苑元宵雅集

茜草流薰，晴波縹碧。花風次第欣逢七。畫樓春酒展元宵，丹青掩映繁燈壁。秉燭飛觴

，憑高望極。惠連吟詠何清發。由來嘉會以詩親，因緣翰墨無南北。

角招國風蓼莪花朝小集龍城醉月樓

望無際。層陰漠漠連朝，釀寒天氣。踏青期近矣。撲蝶放春，卽今誰記。東風又起。怕漸老芳園花事。莫訪故皇臺榭，只餘片石蒼涼，伴花魂而已。紅紫。都饒畫意。凝烟搵露，簪筆終難擬。看鶯吟燕喜。度柳穿簾，依依情味。潏洄一水。嘆十載不成歸計。忍向欄干倚，結腸甚處能消，愁如此。

金縷曲 甲辰初夏大千居士蒞港贈畫

豪邁元龍氣。恣遨遊，清和節序，又掀髯至。碧海琅玕隨日長，堪羨居身福地。只蜀道，難行如是。上國衣冠迎送集，得瞻韓，敢謂尋常事。公對此，笑而已。浮名况是非公喜。喜翛然，丹青健筆，老尤雄肆。湖嶽江河收眼底，尺幅人驚瓊異。問曠代，如斯能幾。桃李徧栽情未倦，更黃金，脫手酬知己。欣接席，且將意。

楊州慢 觀譚華南木屋區圖

板築懸崖，木支危石，風風雨雨愁俱。况燈昏月黑，又仄徑崎嶇。歷榛莽歸人欲倦，烹葵炊黍，滴水如珠。嘆天涯，芳草年年，難賦歸歟。山河舉目，算而今，風景無殊。任黯黯

鄉魂，悠悠旅夢，行矣踟躕。千古杜陵心事，憑誰念，甕牖繩樞。但雲邊花外，閒看廣廈渠渠。

八聲甘州 甲辰四月海聲社初成喜賦

正封姨過也喜兼旬，甘霖洗千愁。看層巒滴翠，飛泉瀉玉，桑土綢繆。共此閒宵樽酒，滄海結盟鷗。時得逍遙趣。嘯傲芳洲。更遣詩騷餘緒，倚黃鐘南呂，獨寫離憂。笑雕蟲小技，偏賦與溫柔。溯流風，越臺吟社，盼而今，韵事接前修。休辭醉，高樓聽雨，涼欲成秋。

八聲甘州 風雨如晦南了之遊不果携餘興作淺水灣竟日遊

正黑風挾雨破天來，驚濤拍沙洲。但望洋興嘆，滄浪怯賦，此意悠悠。未許韶華虛度，題葉憶西樓。水榭流連久，苦茗盈甌。冷醉閒吟湖海，料依依短夢，不到神州。况無邊恨水，何地着新愁。記年時，香車停處，綠楊省識舊風流。休言去，剪燈深夜，涼夏灣頭。

沁園春 梅叔蓬生朝設宴清涼法苑重數前遊已是空桑三宿矣

暉報難忘，歲歲生朝，頂禮釋迦。喜齋厨風味，鮮供蔬筍，騷人雅咏，韻門尖叉。松鶴精神，沙鷗天地。偏愛山林遠市譁。重來處，正槐陰追著，棗火烹茶。籬花。雨過香賒。漸院外遙峯燦夕霞。但平疇一望，山橫澗曲，柔桑十畝，水隔雲遮。小隱爲高，虛名自笑，幾

輩禪門悟法華。叨陪日，識宛陵世德，鳳嶺名家。

蝶戀花

潘新安邀約泛舟

爲問中流深幾許。照影滄波，白髮驚愁鑄。兩岸青山沉極浦。濛濛目斷鄉關樹。傍晚薰風消酷暑。一舸悠悠，莫向匡門去。南渡江山搖落處。無多懷古傷心句。

水龍吟

蓬瀛仙館消夏

晴空野樹無風，箇中猶有清涼地。人言佳處。松濤萬籟，篁陰十里。繞砌苔深，留題字古，儘多吟意。念蓬山隱約，瀛洲浩渺，仙子宅，知誰美。鼻裊鑪薰香篆，照詞心，澄如秋水。詩籌遣興，冰壺追暑。羲皇逸致。摩荔當年，尋梅舊事，徒供莞爾。向靈禽細道，唯君解語，可披肝耳。

錦堂春

中秋後夕屯門待月

不定陰晴，無端風雨，蟬娟莫卜行藏。嘆空抬望眼，也費思量。贏得濕雲宵岫，只餘疎葉含霜。喜詩懷未老，秋心如舊，畫舫邀涼。去年迎月遊處，有金波弄影，玉宇流光。此際封姨次第，掃盡林芳。翹首長空過鳥，連江一霎殘陽。且安排漏永，獨倚高寒，待吐光芒。

朝中措 蘇旭昇黃麗貞劉孔淳偕遊梅窩擬登大嶼半途折返

寒潮寂寞打平沙。仙侶晚來賒。粧點梅窩秋意，愁生賣酒人家。遙山修水，登臨無緒。石壁迴車。省識遊情漸懶，堪嗟猶是天涯。

踏莎行 壽鄧水心老師

雛鳳聲清，齊麋人健。欣逢餞臘開桃宴。華堂幾輩倚新詞，裊然成帙堪裁剪。日月常行，岡陵不變。春融暗遞梅枝見。閒將酒盞換詩筒，從教雅頌蓀枝衍。

永遇樂 甲辰春日過宋王臺

百劫山河，落暉如舊，頑石無語。海角春風，城邊蔓草，曾是離宮駐。興亡事往，花前佇立，渺渺予懷今古。念騷客，蕭條異代，不盡宋臺秋句。中原回首，宮移羽換，俯仰乾坤誰訴。梅蔚鵲啼，淺灣波逝，搖落厓山路。遺臺此日，冬青愁絕，帝子魂歸何處，空留得，殘碑蘚跡，賺人淚雨。

蝶戀花 春感

川上逝波雲幻狗。去日遙遙，來日知何又。幾疊新詩留我袖。鑄愁字字心絃扣。愁雨愁風春漸瘦。眼底芳華，一瞬飛絲候。莫遣雙眉歸僂僂。明年春色還依舊。

虞美人 清明

疎籬怕見紅英冱。故宅知空戀。禁烟纔過又清明。剩有闌珊心緒，伴詩情。踏青正擬屯門去。偏著些兒雨。忽教午日掃陰翳。爲我一春閑了繡花鞋。

望江南 暮春小集南生園

園東路，柳色似江南。欄檻繞廊方水碧，粉榆隔岸遠山藍。天氣已重三。
園南路，白石徑通門。落盡桃花春事少，飛殘柳絮綠陰繁。此際易消魂。
園西路，古道夕陽斜。橋畔低枝先蘸水，雲邊亂影漸歸鴉。兩岸幾漁家。
園北路，繚繞一溪橫。春水半篙人喚渡，綠榕深樹鳥鳴笙。如在畫中行。
園中路，釣水得河魴。自參雞豚烹亦美，時栽蔬笋啖尤香。不覺引杯長。

虞美人 海聲小集讀黃倩芬詞有「柵浦鎖梧桐」句慨然爲賦此解

無端省識伊州譜。正是歸時路。十年一水隔梧桐。爲問遙天消息幾時通。東園蘭蕙長相憶。回首空陳迹。今宵半晌莫思量。且向詩筵笑語換悲涼。

清平樂 何叔惠以楊州慢一闕見寄倚聲答之

雲箋錦字，盡得靈飛意。白石新詞吟數四。忍說黍離心事。漫嗟海燕無家。而今人也天涯。開到桐花春晚，魂消雨橫風斜。

思越人 遊新界泰園漁村

漠漠桑田接陸平。柳眉青，陰未成。自笑臨淵，不解羨魚情。指點當年阡陌處，藕花橋下水無聲。

清平樂 新亞藝展觀顧青瑤畫

吳山粵水，南北相輝媚。壁上丹青疑故里。作箇歸期猶未。皺烟疊石傳神。今時小李將軍。莫著青青楊柳，生妨折贈行人。

鵲踏枝 輓胡景萃文

日日閉門知病酒。賦筆詞牋，驚與人俱瘦。一夜風狂兼雨驟。龍城西畔空回首。如此騷才偏不偶。窅窅幽棲，搖落江潭柳。千古窮愁悲獨有。啼鵲吊月元宵後。

鵲踏枝 輓文雁門文

尙憶樽前驚橫議。晞髮行吟，酒是埋憂地。心力拋殘終已矣！華年不盡蕭騷意。一瞬浮生如旅寄。墨瀋猶新，筆底山川媚。今古同愁寒食裏，歸魂夜夜灘江水。

鵲踏枝 輓洗玉清教授

纔隔關山成夢裏。憶臥滄江，覩面拳拳語。一束生芻遙寄與。琅玕孤館愁秋雨。須信騷

魂猶未死。班左餘微，萬古江河注。我欲升堂天未許。可堪重讀遺章句。

摸魚兒 江村游屐

愛涼秋，又憐風雨。陰霾沈積天宇。算來月色能多少，一年佳景如此。遙寄語。便縱有黃金難買清秋駐。乾坤逆旅。可惜是而今，登臨愴悵，剩有懷鄉句。風雲事，付與痴兒歎女。百年哀樂無據。茶香酒釀思新調。却道堪消閒慮。還記取。芳草外，斜陽城郭經遊處。輕舟容與。正紅葉連江，漁村汐上，莫便匆匆去。

小重山 倚欄

向晚晴嵐挹岫浮。憑欄銷未得，古今愁。醉鄉人道可埋憂。煩貰酒，將出敝貂裘。直北是神州。離離芳草綠，黯凝眸。閒身端合老遐陬。翻新譜，莫倚少年遊。

鷓鴣天 乙巳新春試筆

臥聽春城爆竹聲。隔隣歌吹度窗櫺。已忘爲客猶循俗，揮得桃花滿膽瓶。閒世味，懶逢迎。香燒心字繞雲屏。偶逢勝日尋詩夢，信筆何須著意營。

八聲甘州 和陳襄陵韻兼柬許晚香詞長

對蒼茫百劫舊山河，甘霖洗塵腥。正長空晚霽，風輕雲淡，霞麗波平。隔岸千帆似堵，漁火

幾星星。一夜春歸去，綠遍江城。高閣重來小集，盡班香宋艷，羈思幽情，道元龍過也，肝胆座中驚。儘深杯，能消塊壘，又爭如，孤憤以詩鳴。關情處，陟高臨遠，可有新聲。

唐多令 赤柱海濱望張保仔洞

南浦晚風過。粼粼皺碧波。好光陰，容易消磨。幾點輕帆人戲水，憐春事，更無多。遺洞長苔莎。梟雄亦可歌。問當年，野史如何。歲歲滄浪嗚咽語，知猶戀，舊山河。

紫萸香慢 乙巳十月之望夜飲淺水灣觀海樓

向華堂，軒渠今夕，渾忘秋氣蕭騷。趁霜花猶艷，約詞客，韻分曹。自有滄浪佳趣，羨樓名觀海，靜聽胥濤。只魚龍睡穩，冷月繞林杪。念故國，迢遞夢勞。揮毫。且醉醇醪。知不似，舊情豪。看黃麻一角，南鴉列島，天水滔滔。頃刻烟霞消領，肆吟嘯，敢鳴高。願他年，八荒無事，半裝殘卷，容我歸侶蓬蒿。斯意鬱陶。

采桑子

啓德遊樂場主人賞菊徵詩雅事也倚聲張之

誰云老圃淡秋容。紫翠千重。寄傲西風。絕勝溪橋蓼穗紅。淵明去後存知己，海嶠尋踪。一角城東。留待騷人嘯詠中。

潘思敏茹香樓詞

慶春澤 甲辰初夏偕海聲同人游凌雲寺小塔兄以一先韻先成此唱

浴佛前朝，題襟小集，~~並聞~~料理吟邊。竹秀荷新，紆迴十里晴川。錦田大道千出，斷紅塵，閨苑雲穿。幾滄桑，古寺寒鐘，舊碣殘鐫。
潘郎先有閒居賦，嘆難賡險韻，空瘦吟肩。此地爭如，故家千尺飛泉。簾開辜負名山約，到而今，應許留連。便思量，把酒風前，展卷花前。

臨江仙 重登太平山頂

時復登高舒嘯也，憑欄俯瞰滄州。橫江輪渡過悠悠。清蟬送晚，疏石奔流。擎確摩天雲起處，薰風吹雨初收。山山山外簇岑樓。野棠開又落，游屐去還留。

思佳客 七夕環海

炙約移舟出鯉門。風風雨雨易消魂。仙姬今夕停機錦，逋客哀時寄海濱。銀漢遠，野林昏。人間天上幾離羣。年年重灑分携淚，只見新痕掩舊痕。

浣溪紗 秋陰

志

薄薄羅衣冷氣侵。惱人秋思況輕陰。安排濁酒又慵斟。幾樹有聲雲黯淡，千山無語綠蕭

森。十年塵影費沉吟。

好事近 沙田東覺台

涼氣鬱衣襟，東覺高台石窟。點點零零山溜。浣肌寒如雪。小丘亭外盡梅林，花時韻清絕。此際雲峰遠眺，今夜初弦月。

清平樂 乙巳元宵

開春發歲。處處酴酥醉。莫道情懷今似水。隨分笙歌門市。元宵燈火星浮。綺羅人在嬉遊。尙憶承平今夕，可容歸夢南州。

水龍吟 琴畫會志蓮淨苑禪集

深深花木禪房，幾番裙屐隨緣住。禁烟風軟，重三禊集，勝流星聚。淺醉持觴，陶情雅詠，一時心素。有傳神鳳管，皴烟和墨，人道是，雲林趣。嫋嫋鯉絃雁柱。記蘭亭，當年無此。遙山修水，哀時去國，憑歌寄語。鴉噪晚晴，鶯催春暝，韶光易去。漫興懷今古，獅山不敗，宋宮何處。

虞美人 西貢

烟銷日出西陲路，放眼幽花好。幾重藍水幾重山，道是春光常在白沙灣。陰庭嘉木偃